



三藩紀事本末 下

伊 3159 2



三藩紀事本末卷三




楊劉萬殉顛

青浦楊

陸榮采

南氏編



崇禎甲申，闖賊破京師，江西在籍翰林院修撰劉同升聞變，痛哭幾絕，檄告江西十三郡紳士，舉義復仇。縞素別立龍而出，至南昌，遇職方主事楊廷麟、大集紳士於澹臺祠，為懷宗發喪，涓志誓師進發。福王立，授同升左中允，廷麟左庶子，俱辭不拜。唐王立於福州，擢同升少詹事，兵部侍郎，總理江西，而廷麟以東

閣大學士召廷麟以國破君亡偷安海甸為非計辭
不拜與顛撫李永茂及同升共舉義旗會粵東有人
衛兵三千過顛即疏留之立忠誠社於贛州招致四
方之士於是王其宏其隆劉明保彭曰趣等各率家
丁自贛糧入社立功者幾二萬人廷麟乃大亨士於
城西率兵收萬安抵泰和復吉安全郡乃奉表迎唐
王赴贛 順治二年乙酉十一月李永茂以憂歸而萬
元吉以總制七省至顛與同升廷麟同心規畫時永
寧王已復撫建約同下省而同升已病未幾湖東告

潰十二月同升卒於雩都事以不果初元吉佐楊嗣
昌史可法兩閣部軍與江西總兵金聲桓素善聲桓
收江右以書幣招元吉元吉辭以各行其志聲桓勿
逆也至是元吉主撫金以恢省因移書聲桓聲桓頗
心動而未決三年丙戌三月吉安守將胡長蔭違元
吉節制為我將柯永盛所敗吉安復失元吉走皂口
欲赴水永豐令林全春亟持之乃還保贛州 我兵
尾之拔萬安遂圍顛聲桓聞遂絕給事中楊文薦
者奉命往湖南過顛見事急願留共城守元吉賴之

先是正月廷麟招降峒寇得四萬人所謂四營者也
張安者四營之一驍勇善戰賜名龍武新軍元吉倚
之而蔑視雲南廣東諸軍諸軍解體五月江西巡撫
劉遠生督張琮來援戰於梅林而敗龍武新軍亦敗
於梅林於是援兵皆不敢前元吉苦客將不用命且
出掠為民患乃謀鍊土著更番出戰頗有斬獲我
兵移下沙然元吉御兵士嚴刑威不少假貸故兵士
不樂為之用贛圍久王賜郡名忠誠加元吉兵部尚
書文薦僉都御史六月李永茂遣副將吳之蕃以廣

東兵五千至七月吏兵兩部尚書郭維經奉命總理
江西湖廣軍事與御史姚竒胤沿途募兵得八千人
至雲南援將趙印選胡一青率兵三千至大學士蘇
觀生遣兵亦如之兩廣總督丁魁楚亦遣兵四千至
軍聲頗振諸軍皆欲戰而元吉欲俟水軍至共擊是
時中書舍人來從諤募砂兵三千吏部主事龔榮兵
部主事黎遂球募水軍四千皆屯南安不敢下兵部
主事王其宏謂元吉日水腫羅明受海盜也桀驁難
制且今水涸舟行為難豈能如約不聽八月大軍

聞水師將至，即令兵士夜截諸江，焚巨舟八十，明受
遁。於是諸營皆散去。元吉弟六吉調廣西狼兵八千
至南安，亦不戰潰。已聞唐王被難汀州，全城氣索。十
月，天霧雨雪。我兵乘夜上城，破元吉率士巷戰，
奪門出。至東關，歎曰：「大事去矣！」投貢江而死。廷麟死
於清水塘。我將賈熊歎為忠臣，以四扇門為棺，瘞之
東門之外。維徑與奇胤同。益於嵯峨寺。湖西兵備僉
事加太常卿彭期生，衣冠自縊。職方主事周瑚被獲，
磔死。通判王明汲編修兼兵科給事中萬茂祥，吏部

主事龔榮，戶部主事林琦，兵部主事王其宏，同弟其
隆、黎、遂、球、柳、昂、雷、魯、嗣、宗、錢、謙、亨，中書舍人袁從諤，
劉孟鈞、劉應試，推官署府事吳國球，監紀通判郭寧，
登、訓、導徐君鼎，都督僉事劉天駟，臨江推官胡鎮顛，
縣知縣林逢春，皆被戮。邑人河南同知盧觀象，盡驅
男婦入池，乃自沉死。馬平知縣謝讚，與子胤繡、姪胤
斗，衣冠自縊。舉人劉日佺，同母妻子姪弟婦同日自
盡。薦授萬州判官月世光，携幼孫同盧觀象赴池死。
世襲贛衛千戶孫徑世，同弟緯世、鈺世，閣門自焚死。

監紀軍務聶邦晟同子士燦士煥妻劉閻門死貢生
楊萬言同妻子赴池水死庠生郭其昌同妻范號泣
三日死董纘卿同子麒兆正宸正朝俱死之謝明登
同妻羅子佛生赴池死馮復京同妻張對溢死余學
義母周先自溢學義同妻鍾子婦丘二孫赴水死陽
麗天同妻赴清水塘死金之杰巷戰殺數人携妻赴
水死王統王純溢於文廟周葵陳君猷積薪自焚死
鄉約謝明登同妻楊赴井死雩都訓導胡董明被執
見殺寧都曾嗣宗楊燧俱自徑死書工趙廷瑞赴水

死織人熊國本赴義忠誠社至是被執贛令舉人也
叱之曰爾織人何知義國本曰織人不知義舉人顧
當為不義耶引出斬之叅將陳烈其弟降於我烈奮
勇疾鬪至是被執其弟勸之降不從乃殺之其以流
寓同難者廣東提學道符遯中同兄述中新喻進士
萬發祥廬陵庠生段之渾新喻庠生蕭瑛

金王之亂

金聲桓字虎夫遼東衛籍。王師平遼東全家被俘。獨聲桓跳走入關。王得仁闖部裨將驍勇善戰軍中所稱王襍毛者也。聲桓性沈猜善持兩端以軍功累官總兵都督同知隸左良玉後軍。順治二年乙酉五月左夢庚率之來降命與闖部降將王體忠合營規取江右未幾聲桓矯殺體忠以得仁代之江右既平聲桓自以為不世功旦夕望侯及收江疏還僅授副總兵而得仁銜不列得報氣沮招撫孫之獬至南昌。

聲桓所置將吏漸有更易江撫李鳳翔繼之益加裁制聲桓心快。聲桓常師事雒陽僧德宗德宗每奇聲桓嘗拊聲桓背曰勉旃二十年江右福力變江頭蟲此其候也及是果着江纓建牙江省益尊信之德宗每為聲桓言勸其改圖南昌胡以寧在聲桓幕中言如德宗指胡澹陳大生等各錄以迎合聲桓又覘知得仁所居故宜春王第每後堂張宴自着明衣冠令優伶演郭子儀韓世忠故事諸客聞之益心動先是福州之破仕閩者或有空頭敕劄持歸至是日緣

間露且言唐王尚在二帥聞之益自喜且負江撫李鳳翔死章於天代之遇諸將益倨索賄無厭足一日宴於藩署席地鋪氈文吏皆坐氈而聲桓得仁顧坐氈外得仁有忿色於天嘻笑顧視曰王杞總欲反耶宴歸二帥恥甚四年丁亥七月得仁提兵往建昌於天又遣人索賂累億得仁怒裂眦大有惡言八月歸自建昌勸聲桓速舉事而聲桓以前遼東被俘妻子留京未歸又胡以寧新亡遣人往湖南覘知何騰蛟為我兵所敗遲疑未發巡按董學成至有以二家

陰事告者。學成揚言欲奏聞。而陰索得仁賂。並其侍兒。得仁恐以侍兒予之。則居家狀泄有驗。堅不肯予。時幕中諸客說言。唐王在五子寨。二帥即遣客往探。唐王實耗客。即假唐王命。封声桓為鎮江公。得仁為維新侯。二帥大喜。過望。五年戊子正月。章於天。忽率數騎出瑞州。捕掠諸富室。或告得仁曰。此非為索賄賂也。前聞有滿騎數千。不知所往。或徑往贛州。約同贛撫會議。而後發。則須搖公等。得仁大懼。適声桓妻子還自燕。声桓乃召胡濙等入議。遣人以書釣山。

東河南並發。得仁提兵出建昌。合揭揚諸部。然後舉議既定。或說得仁曰。声桓疑而多詐。脫中變。而公顧居外。且奈何。不若坐據省會。仗鉞投袂。為不可遏之勢。脅声桓。不敢不從。但貴神速耳。得仁大喜。立傳令部勒全營。杜七門圍守。董學成官署。時正月二十六日夜漏下三十刻矣。翌日癸亥。七門不啓。得仁躬擐甲。往傳學成。赴声桓署。白狀。声桓蒲伏問故。得仁曰。詔云然。何敢後也。声桓唯。得仁即前為声桓剖辯。以声桓令箭傳示諸協。悉去。辯出示安民。稱

隆武四年，即日絞殺學成及副使成大業，軍民戴滿帽者，輒射之。城中委棄纓笠，積如山阜。得仁遣將擒章於天於江中，聲桓首迎在籍閣。臣姜日廣入省，諸金弟族皆為都督。得仁婦弟黃天雷為兵部侍郎，聲桓幕客黃人龍為總督，二人各開幕門如市。初，聲桓誅體忠後，謀嘗與得仁合，及是各自為功，所樹吏率分東西府，嫌隙始開。二月朔，得仁提兵下九江，胡澹說得仁宜乘破竹之勢，疾趨建業，下流猝無備，又舉建業舉則克豫，響應率兵而北，中原可傳檄定也。而

聲桓聞捷，輒召得仁還。得仁以澹謀告，聲桓眾皆主之。獨黃人龍不可，曰：「贛州居省上流，文武督在焉，宜先定贛，不然且擬我後。」聲桓從之，立議取贛。聲桓得仁偕行，而以宋奎光守南昌，兵圍贛州，城固不可克。聲桓乃令得仁往綴章貢上下，而自引兵踰嶺，恢雄韶。時南中頌永曆年號，至乃遂稱永曆四年。聲桓遣書廣督李成棟，共興復。成棟遂叛，拜表粵東，迎永明王駐肇慶。王因實封聲桓為昌國公，得仁為新喻侯。師留贛，且老。省內虛。四月，大兵入湖口，五月朔破

九江偽守將吳高遁二日下南康偽守將白之齋潰
七日千騎至石頭猶不意為我兵也見江饒白帳
始色駭明日鐵騎滿西山矣我固山譚泰先從東入
破饒州饒州偽將潘永禧遁王師尾之至南昌而
令偏將自潯入搜麥源青嵐諸道薄西山故朱下營
血刃已數百里大兵圍南昌声桓兄成功約降於
我奎光諜知殺之得仁部將貢鰲声桓部將楚國佐
以其軍叛奎光追及復殺之大兵攻得勝門城壞
數處奎光囊土塞之得不破旋出神鎗火箭焚我攻

具我兵少却報至贛声桓得仁大懼撤兵急回贛
帥掩擊亡其大半十九自声桓偽先鋒劉一鵬與我
戰獲大炮三得仁繼至聞前捷即氣揚甚不韋馬而
馳中伏大敗於七里街即氣索甚盡撤城外屯兵入
壁全部偽將郭天才爭之不得自扎黃泥洲為犄角
天才所統盡川卒精銳無敵先提偏師入閩不克歸
我兵已圍南昌矣天才三戰三捷我兵頗憚之
宋奎光單騎渡江按行地利請移兵二隊一駐生米
渡一駐市汊以達餉路天才請大舉逐我兵皆不

聽專主堅壁。我兵雖勝，每慮得仁襲之。軍中常夜驚，王禕毛來也。久之見城中終無出兵意，乃用鎖圍法。東自王家渡，屬灌城；西自雞籠山，屬生米渡，掘壕載版，起土城。自是內外耗絕，設南昌令於白茶市，新建令於蛟溪，徵役索賦，安坐而制其斃。得仁自亡軍後，不復親督陣，方娶武都司女為繼室，繡旂親迎，金鼓喧襍。我瞭者望而大駭，莫疑為王禕毛娶婦也。十月朔，天才六，撤軍入城。已城中糧盡，人相食，乃大出居民，兩帥情實盡為我得。我因得以餘暇，旁收郡縣。

西南逐偽守張啟祥，西北降偽寧將鄧雲龍，東南破傅鼎銓之援師。北戕^伐余，應柱於都昌，劉斯棟於梓溪，東收徐光程，西破丁家塘土寨。声桓聞之，惟嘆喑悼，恨而已。十有二月，我師再乘城，山東人全時鳴令以鐵網籠之，鐵鈎曳而傷之，損傷過當。六年己丑正月，声桓部將湯執中守進賢門，其偏裨某約來降。譚固山因以厚陣佯攻，得勝門，炮聲聞三百里。兩帥齊師赴焉，而奇兵已從進賢門梯而上，城遂陷。声桓赴池水死，得仁陣獲，禕死。宋奎光、劉一鵬、郭天才皆被

執不順命死。姜曰廣赴僕家池死。得仁矣。得勝門三
出。三入。與譚固山馬首再相值。譚不知其為得仁。得
仁亦不知其為譚也。初。声桓之主堅壁也。以待廣師
之援。而吳尊周所草乞師表文。但陳勝狀。而不告急。
既聞江事危急。乃遣李赤心由袁吉。李成棟出南雄。
會南昌。赤心逗留不進。成棟敗死。信豐遂以不救。

王師南征

順治四年丁亥三月。我大清命定南王孔有德。靖
南王耿仲明。平南王尚可喜等。率兵下湖南。定興伯
何騰蛟與總兵郝永忠退保衡州。張先壁走寶慶。

湖北巡撫堵胤錫走永定。衛王有才
馬進忠等走五溪山中。五月。大兵抵衡州。永忠北
總兵黃朝宣等被擒。騰蛟退保永州。從者惟滇將趙
印選。胡一青等數人。八月。大兵破武岡。常德。寶慶。
盡失。總兵劉承胤敗績來降。永明王走靖州。由蠻道。

以達柳州。土司覃鳴珂與守道龍友明相攻，遂陷柳州。矢及王舟中，王走象州時，大兵已定湖南。永州亦破，騰蛟與永忠、盧鼎俱入桂林，與留守瞿式耜議分地給諸將，俾自為守。式耜督焦璉復陽朔及平樂，陳邦傳復潯州，合兵復梧州。粵西尚稱全土，王回桂林。五年戊子二月，大兵入粵西，永忠潰於興安，返入桂林。大掠三月，大兵至桂北門，垂破，聞金聲桓反於江西，乃退入楚。五月，騰蛟復全州。六月，成棟以粵東叛歸於王，王封成棟惠國公，聲桓豫國公。一云

昌國公王得仁，僖養甲杜永和等，侯伯有差。成棟子元胤為錦衣指揮使，王返肇慶，騰蛟復督師出湖南，由永入衡，胤錫亦以忠貞營自常德趨湘潭。十月，成棟犯贛州，先是江西悉反，惟贛州為我將高進庫所守，聲桓攻之不克，乞師粵東。成棟援之，戰不利，退屯南康縣。六年己丑正月，大兵破南昌，烏金王下湘潭，執騰蛟。二月，成棟敗於信豐，騎而渡河，馬蹶墮水，死。事聞，以杜永和為兩廣總督，駐廣州。代成棟羅成耀守南雄。大兵由湘潭薄衡州，胤錫敗，衡永俱不

守十二月我平南王及嗣清南王耿繼茂下廣東羅
成耀遁南雄不守七年庚寅正月十四日下韶州王
聞庾關失守奔梧州留馬吉翔李元胤守肇慶二月
大兵圍廣州調潯帥陳邦傳及忠貞營高必正東
援邦傳故與元胤有隙意在修怨又憾必正等之屢
擾其境也陰令副將姚春登等連結土司會李來亨
等調兵土司遂相仇殺必正怒而歸忠貞營者成孽
餘黨詹錫所招撫者也時散處賓橫間故邦傳惡其
擾時李赤心已死故必正領其營邦傳駐清遠馬吉

翔駐三水俱不敢進以城守久進永和爵為侯元胤
弟建捷力戰有功封安肅伯廣州城三面臨水成棟
在時復築兩翼附於城外為砲臺水環其下大兵
攻圍十閱月不下永和偏將范承恩為內應決砲臺
之水大軍藉薪竟渡遂得砲臺十二月二日城破
永和由海道奔瓊州建捷奪圍至肇慶邦傳潰於三
水而我定南王亦已入全州五日破桂林詳見武邦
勦殉粵
傳聞桂林破遣兵邊劫從官於藤江殺部郎潘駿觀
許王鳳等王跟踪奔南寧胡一青趙印選率兵駐賓

州八年辛卯 大兵取肇慶元脩建捷奔南寧會孫
可望遣賀九義殺內閣嚴起桓等元脩忿甚請出靈
山收高雷之兵迎王入海至欽州為土兵王勝堂所
執送靖南王所不順命令作書招杜永和亦不從與
弟建捷俱斬於市九月陳邦傳叛降於靖南王報至
南寧王震恐議奔廣南後軍印選一青之師復敗與
大兵相去不五十里王遠由水道走土司抵瀨湍
轉入羅江土司次龍英至廣南歲已暮矣時可望已
受秦封遣人來迎九年壬辰二月可望遷王於安陸

改名安陸 大兵取瓊州杜永和來降

何騰蛟殉楚

崇禎癸未起何騰蛟右僉都御史代王聚奎巡撫湖
廣初騰蛟為南陽知縣數摧賊鋒已從巡撫陳必謙
破賊安臯山及討平土寇益知名後以部郎出僉懷
來憂歸起淮徐兵備復平土寇至是遂有是擢時左
良玉屯武昌橫甚順治元年甲申五月福王自立於
江南詔至良玉時在漢陽有異言騰蛟赴良玉軍爭
之而良玉參軍盧鼎亦言於良玉乃開讀如禮八月
王加騰蛟兵部侍郎兼撫湖南尋以故官總督湖廣

四川雲南貴州廣西軍務乙酉南京有北來太子事
良王遂舉兵東下邀騰蛟與俱不可則盡殺城中人
以劫之騰蛟急解印付家人速走將自刎為良王部
將擁去舟至漢陽騰蛟乘間躍入水中漂十餘里遇
渙舟救之起則閔壯繆廟也而所遣家人懷印者亦
在相視大驚遍覓漁舟已不見蓋有神祐云騰蛟乃
從寧州轉瀏陽抵長沙集屬吏痛哭盟誓權令堵脣
錫攝湖北巡撫傳上瑞攝湖南巡撫章曠為總督監
軍周大啟提督學政嚴起恒衡水道督二郡軍食吳

晉錫以長沙推官攝郴桂道隨遣曠調黃朝宣張先
壁劉承脣等兵先後俱至而良王已死五月唐王自
立於福州王素知騰蛟賢委任益至李自成死其將
劉體仁郝搖旗等觀望無所歸騰蛟遣部將萬大鵬
招之搖旗等大悅與大鵬俱至長沙騰蛟開誠撫慰
於是蘭養成王進才牛有勇皆來歸驟增兵二十條
萬軍聲大振既而自成部將李錦高必正率眾逼常
德騰蛟命脣錫撫之亦來降於是自成餘黨悉歸騰
蛟一時詫異事而騰蛟上疏止言元克已除宜告郊

廟不言已功。唐王大喜，拜騰蛟東閣大學士兼兵部尚書，封定興伯。仍督師規取兩江。於是騰蛟部置降卒，參以舊軍，乃題授黃朝宣、張先璧為總兵官，劉承胤、李赤心即李錦改名、郝永忠即郝搖旗改名、袁宗弟、王進才及董英、馬進忠、馬士秀、曹志建、王允成、廬鼎並開鎮湖北。時所謂十三鎮者也。丙戌正月，騰蛟拜表出師，李赤心敗於湖北，騰蛟威望自此損已。而唐王死於汀州，騰蛟聞之大慟。永明王立，以騰蛟為武英殿大學士，加太子太保。丁亥，大兵逼長沙，騰蛟不能守，單

騎走衡州。長沙湘陰盡失。時守衡州者盧鼎，而張先璧率兵突至，鼎不能抗，走永州。先璧遂挾騰蛟走祁陽，趨辰州。騰蛟脫還，赴永州。甫至，而鼎部將復大掠，鼎走道州。騰蛟與侍郎嚴起恒走白牙市。大兵遂平衡永。於是前所置十三鎮者皆起而為盜。未幾，部將周金湯復永州。六月，騰蛟在白牙市，諸將皆不用命。劉承胤由小校騰蛟薦至大帥，封定蠻伯。尤忌騰蛟，於是騰蛟與為姻。奏王進安國公勛上柱國，而承胤益驕，忌騰蛟出已上，欲奪其權。騰蛟固無如承胤。

何也。於是騰蛟無兵，王命雲南援將趙印選、胡一青兵隸之。八月，大兵破武岡、常德、寶慶，盡失。永亦再失。王由柳州將返桂，而城中惟焦璉一軍。兵孱其騰蛟，率印選一青入助。會盧鼎亦以兵至，桂林乃安。戊子正月，加騰蛟太師。爵世侯。二月，郝永忠、趙印選兵大掠桂林。大兵偵知，直抵桂北門。騰蛟與璉一青分門拒守。大兵乃還。三月，李成棟以廣東叛歸於王。大兵暫回。於是騰蛟復全州，保昌侯曹志建、宜章侯盧鼎、新興侯焦璉、新寧侯趙印選復永州。職方

主事李甲春復寶慶。諸將復衡州。馬進忠復常德。騰蛟議進兵長沙。適李赤心自夔州至，督師堵胤錫令進忠以常德讓赤心。進忠大怒，盡驅居民出城，焚廬舍，走武岡。諸將皆空城走。騰蛟聞，六大駭。己丑正月，携吏卒三十人邀赤心。赤心至湘潭，見空城，也不守。去。騰蛟入湘潭。大兵見騰蛟入空城，遣徐勇入之。勇故騰蛟部將，勸騰蛟降。騰蛟不從，乃擁之去。飽粒七日不死，乃殺之。騰蛟所居有神魚井，故無魚也。騰蛟生魚，忽滿井，皆五色。騰蛟既遇害，井魚亦空。

瞿式耜殉粵

順治二年乙酉八月福王起原任戶科給事中瞿式
耜為應天府丞旋擢右僉都御史代方震孺巡撫廣
西時靖江王享嘉據桂林式耜與焦璉定計令思恩叅
將陳邦傳以兵攻桂林破之王破擒殺於福州九月
唐王死於汀州式耜與魁楚奉永明王由榔監國肇
慶王拜式耜吏部右侍郎東閣大學士兼掌兵部事
十月王聞贛州破將趨梧州式耜爭之不能得十一
月唐王弟聿錡據廣州總督林佳鼎敗殁式耜視師

峽口四年丁亥。王師破廣州入肇慶遂逼梧州。巡撫曹暉降遂襲平樂。王將奔全州。式耜疏言。王留粵則粵在。去粵則粵危。我進一步人亦能進一步。我去速一日人來亦速一日。去而不守則拱手送矣。言甚切。至王不聽。遂奔全州。而進式耜文淵閣大學士兼吏兵兩部尚書守桂林。三月大兵薄桂。突入文昌門。登城樓以瞰式耜署。援將焦璉拒戰甚力。式耜以身立矢石中。与士卒同甘苦。援兵索餉而譁。式耜括庫不足。妻郤捐簪珥助之。故人無叛志。既而主客兵不和。璉兵譟而去。城幾破矣。會陳邦彥攻廣州。大兵引而東。桂林獲全。於是焦璉復陽朔平樂。陳邦彥復潯。合兵復梧州。王聞捷。封式耜臨桂伯。璉新興伯。餘進秩有差。十一月大兵自湖南逼桂林。式耜與何騰蛟拒却之。五年戊子二月。郝永忠駐桂林。與團練兵相惡。盡破水東十八村。既與大兵戰靈川而敗。復大掠殺太常卿黃太元。諸將趙印選諸營自靈川至。亦大掠。城內如洗。大兵聞桂林有變。急來襲。騰蛟拒戰。獲全。閏三月李成棟據廣東。來歸請王赴

廣州式耜慮為所制，急爭之，乃駐肇慶。成棟具疏言：式耜擁戴元臣，不宜久在外。王召式耜，以國事讓成棟，願留桂。十一月，永州、衡州、寶慶相繼恢復。式耜以機會可乘，請王還桂林，以圖出楚，不聽。六年己丑正月，何騰蛟被執於湘潭。二月，成棟敗歿於信豐。王命式耜留守督師，兼江楚各省軍馬。戎朝亦遣書招式耜，式耜不從。七年庚寅正月，南雄報不守，羅成耀遁，韶州亦失。九月，全州破，趙印選在桂林。胡一青、王永祚在榕江，皆惶懼不敢出。大兵遂入嚴關。

十月，榕江不守。十一月，諸將皆逃，城中無一兵。式耜端坐府中，俄總督張同儼自靈川回，入見式耜，誓同死，因俱就執。幽之民舍，兩人賦詩唱和。閏十一月，殺之。風洞山下，故給事中金堡時已為僧，名澹歸，上書定南王，請收瘞式耜同儼，不報。吳江吳執收而瘞之北門之園。

孫李構隙

崇禎甲申張獻忠盜蜀僭號順治三年丙戌我肅王
西征殺獻忠於西充縣之鳳凰坡其黨偽平東將軍
孫可望偽安西將軍李定國偽撫南將軍劉文秀偽
定北將軍艾能奇偽都督白文選馮雙禮等呼集偽
衆奪重慶府殺平蜀侯曾英四年丁亥春由遵義入
貴州時雲南土司沙定洲作亂據雲南省城黔國公
沐天波出奔永昌定洲追之間兵巡道楊畏知據楚
椎起兵討賊乃留圍楚雄不能克可望在貴州聞滇

亂兼程趨滇三月二十八日屠沾益州明日屠曲靖
定洲急收兵還阿迷與可望遇於蛇花口接戰大敗
遁去可望遂取雲南右僉都御史宗室壽鏞以永明
王命募兵雲南為可望所繫脅降不從被殺巡按御
史羅國瓚死之可望遂引兵而西遇畏知於綠豐
縣畏知迎戰大敗被執不屈許以共獎明室畏知乃
降可望兵至大理遣人往永昌招天波並索道府印
署府篆通判劉廷標署道篆推官王運開咸曰印往
則我亦降矣乃相繼自縊運開弟運閔赴水死天波

降於是可望自稱平東王以劉文秀等守雲南可望
自滇回黔執總兵皮熊而釋之初可望赴滇熊由平
越收兵復貴州可望回熊不能禦走清浪衛可望使
白文選追執之可望既至黔設官鑄錢造符敕謀僭
大號而定國文秀等故等夷各自稱王不相下定國
尤强悍議齟齬不合六年己丑春可望杖定國於演
武塲以威衆孫李之隙自此始己而定國率兵征沙
定洲獲之於湯嘉賓砦斬之兵益強可望不能制稱
帝之意始沮時永明王自立於粵東已四年矣可望

按明史楊畏知傳云
孫可望入雲南前御
史臨安任僉議等
可望為國主以千文
紀年鑄與朝通寶
錢即此也

苦無以制其下，願奉朔來歸。因遣楊畏知入粵，時武康伯胡執恭屯泗州城，知可望強欲藉為援。畏知至則大喜，遽矯冊封可望為秦王，而畏知至肇慶見王，道可望歸順意，為請封。大學士嚴起恒、都御史袁彭年、科臣金堡等執不可，畏知言可望兵力強，可藉以為用，何惜？封號以樹敵。楚南督師堵胤錫亦以為請，乃議封可望景國公，賜名朝宗，定國文秀皆列侯。胤錫曾賜空敕，得便宜從事，遂矯命改封可望為平遠王。使至，可望先受秦封，不受命。遣人至梧州問故。

王始知矯詔事，馬吉翔請封可望為潞江王。使者言非秦不敢復命，嚴起恒與督師尚書楊鼎和、科臣劉堯珍抗疏力爭，議遂寢。七年庚寅十一月，大兵破廣州，下桂林。王走南寧，事益急，乃遣編修劉道封可望為冀王，仍不受。時艾能奇已死，可望并其眾益強。八年辛卯，可望遣賀九義、張勝、張明志赴南寧，索沮秦封者。九義遂追殺鼎和於崑崙關，殺起恒而投之水，屍流三十里。虎負之登岸，乃收瘞之，并殺堯珍及吳霖、張載述等。霖、載述未嘗沮秦封，以曾劾主秦封。

者故殺之於是真封可望為秦王畏知見九義凶悖
痛哭入朝疏其擅殺大臣罪請誅之王因留畏知入
閣辦事可望聞大怒遣鄭國執畏知以歸畏知望見
可望即大罵以頭憤擲可望面可望遂殺畏知定國
文秀素與畏知善聞畏知死益切恨可望是時大
兵日逼南寧不守九年壬辰春二月可望乘間遷王
於安陸先是 大兵已取湖南定兩粵定南王孔有
德提兵入黔定國禦之連破靖沅武岡入桂林當是
時定國兵力強甚不復稟可望約束可望忿甚已戰

於衡州而敗可望使人召之赴沅議事將回其敗而
殺之定國覺其意辭不行遂入粵西初可望遣雙禮
邊定國為定國所敗擒而釋之故雙禮傾心定國十
年癸巳可望自率兵追定國猝遇 我兵而敗歸則
盡殺明宗室之在黔者王處安隆勢日窮促知可望
與定國有隙乃與大學士吳貞毓謀先以計遣可望
腹心文安侯馬吉翔往南寧祭陵乃遣林青陽充使
封定國為晉王趨使來迎定國奉檄感激流涕然以
兄事可望久未敢輕發一日劉議新自定國營過南

寧見吉翔語及定國受勅事吉翔大驚遽聞之可望
十一年甲午可望遣鄭國王愛秀至安隆索首事者
繫閣臣貞毓極刑拷掠貞毓曰凡事宰相主持我約
李定國討孫可望是實諸臣無與而吉翔已報坐十
八人其主謀某草敕羅織成案於是主事張鵠太監
張福祿全為國凌遲死蔣乾昌李元開李欣胡士瑞
徐極楊鍾趙廣禹蔡演鄭允元周允吉朱議晁朱東
旦任丰墟易士佳等皆棄市貞毓以大臣賜自盡可
望憾定國益甚然以將兵在外不敢輕樹敵仍厚養
其妻子於雲南定國亦防可望襲之益取高雷廉州
以自固十三年丙申定國進攻新會大敗率殘兵奔
南寧將由安隆入滇可望偵知之使文選赴安隆勸
王回黔合宮大慟文選雖為可望用然心不直其所
為因以情告王曰姑遲行候西府至西府謂定國也
定國至安隆文選歸之共奉王趨雲南王封文選為
鞏昌王時守滇者為劉文秀王尚礼王自奇賀九義
文秀數怨可望遂以數騎私近定國迎王入滇王封
文秀為蜀王尚礼保國公自奇夔國公令文選還黔

慰諭文選至可望斬其二於定國也悉奪其所部兵
羈之軍中然以妻子尚在滇未敢遽反十四年丁酉
春王使張虎送可望妻子於黔可望遂反可望諸將
馬進忠馬惟興馬賓最稱勇健而素善於文秀且與
文選交密因從容謂可望言今諸將中才無出文選
右者大將非文選不可可望從之乃留双礼守貴州
而以文選為大將軍統諸軍前行九月定國文秀帥
師至三岔河與可望夾交水而軍文選輕騎奔定國
可望以李劉俱出會城必虛回遣張勝馬賓由尋甸
間道襲雲南而自將勁卒擊定國十九日戰方合惟
興等內叛將士大呼迎晉王一軍瓦解可望狼狽回
貴州而襲雲南之師馬賓不戰來降張勝抵城下尚
礼謀內應沐天波覺之守之以兵得不發定國兵回
遇勝於渾水塘擒而誅之尚礼仰藥死於是文秀文
選窮追可望於貴州可望挈妻子走長沙來降於我
徑略洪承疇軍前双礼為可望斫後截其子女玉帛
來降於文秀同歸雲南王封双礼為慶陽王進忠為
漢陽王惟興與賓及九義俱進公爵其偽德安侯狄

三品偽岐山侯王會、偽荆江伯張光翠、以黨附可望、降爵有差、惟文安侯馬吉翔善逢迎、入閣辦事如故、十五年戊戌春正月、可望至京師、封義王、

孫李奔北

順治九年壬辰春二月、定南王孔有德以七百騎出河池向貴州、大軍駐柳州、接應孫可望乃謀內犯、使李定國馮双礼由黎平出靖州、馬進忠由鎮遠出沅州、會於武岡、以圖桂林、劉文秀張先璧由永寧取叙州、白文選由遵義取重慶、會於嘉定、以圖成都、可望疏請封定國為西寧王、文秀為南康王、五月定國進攻靖沅武岡俱下之、有德還守桂林、定國由西延大埠疾趨而進、我師遇於全州、不利、七月四日定

國陷桂林，獲前降將陳邦傳及其子曾禹，送貴州去。其皮而殺之，有德自徑死，家口百二十人悉被殺。惟一女年十七，逸出城，單騎走。京師哭訴於

憐而養之。宮中後歸其原夫孫延齡。十一月，我敬謹親王尼堪統兵攻衡州，定國敗走。王率精騎追之，遇伏殞於陣。固山佟圖賴監其軍，定國收兵屯武岡。十年癸巳春，定國回廣西，可望使人召定國不至，可望自率兵追之。大軍至賓慶，與可望遇，雙禮將左文選將右。我軍見可望龍旂，急攻之，可望壯，惟雙

禮軍不動。我軍鑿衡州之失，亦不追。以武賓之間為界定國，遂得據廣西。已與馬寶由懷集東攻肇慶，不能克。秋攻高州，破之。雷廉俱下。十二年乙未，可望犯常德，敗績。定國攻新會，不能克。十三年丙申春，平南王擊敗定國軍，定國奔南寧，遂抵安陸，奉王趨雲南。十四年丁酉，可望來降於王師。十五年丙戌春，正月，命楚蜀粵三路兵入黔，定國使劉正國、楊武守三坡、江關諸要險，以防蜀馬進。忠駐貴州。四月，夔國公王自奇、永壽伯闕有才反，定國自率兵討平之。楚

兵自鎮遠入貴州，屢告急。定國不及援，遂平貴州。進
忠遁。蜀兵至三坡，劉正國奔回雲南。蜀兵克遵義。五
月，蜀兵擊破楊武於開州之倒流水。七月，粵兵抵獨
山州。十月，三路兵俱集，戒期入滇。定國與双礼等抗
雞公背，圖復貴州。文選守七星關，示犯遵義，以牽制
蜀兵。十二月，蜀兵出遵義，趨天生橋，入烏撒。文選懼，
走回霑益州。泗州土官岑繼祿導粵兵入安隆。定國
使懷仁侯吳子聖禦之，敗績。定國回師拒戰，連敗。大
營妻子俱散失，諸將各敗走，不相顧。馬宝等或來降。

定國撤寨遁回。十五日，報至。王走永昌。十六年己亥
春正月三日，大兵入雲南。二月，文選敗於玉龍關。
初，文選自霑益追及定國，回留之。斷後。二月，大兵
出雲南。十日，敗王國勛於普湖。十五日，至大理之玉
龍關。文選與張先壁、陳勝俱敗。文選乃從沙木和走
右甸，由鎮康而出木邦。定國先伏兵於潞江之高黎
貢山中。十八日，大兵抵永昌。二十一日，次潞江前。
驅遇伏，不利。適中書盧桂生來降。定國謀洩，乃分精
甲先蹂伏處。定國遇大軍，不能支，曰：「退師出騰越。」

走孟定而王已入緬矣

三藩紀事本末卷四

青浦楊陸榮采南氏編

永明八編

順治十六年己亥正月王自雲南赴永昌警報日至
二月十五日李定國令總兵靳統武率兵四千人自
永昌啟行十八日抵騰越時李國泰馬吉翔輜重甚
厚恐遭劫奪從王連夜即行兵馬過處火光燭天右
轉左旋天明仍在故處二十八日至銅壁關統武去
王仍歸定國緬人知王抵關令從人悉去兵器方許

入關。是日次蠻漢。緬人迎貢。頗成禮。昆明諸生薛大
觀與子之翰聞王入緬。投黑龍潭死。二十九日駐扎
定。三月一日到河岸。河中惟四舟。止是供王用。而河
傍又無他舟。可買從人。乃登陸。紆路赴緬。途中遭劫
殺者。通政使朱蘊金。中軍姜承德。副總兵高陞。皇親
馬九功。千戶謝安祚。向鼎忠。范有禮。溫如珍。李勝。劉
興隆。段忠等。皆死於難。初六日開舟。二十四日至河
瓦。請大臣過河。向議冊寶。視神宗時差小。疑以為假。
皮出沐國公印對。同乃信。因請王及文武臣居舊城。

復請王敕關上無得納漢兵。三月十七日陸行人到
緬。緬王曰。此非來避亂。乃重應外合兵也。發兵圍之。
殺傷甚多。僅存者分散。各村居住。挽兵潘世榮降於
緬。或云在途被殺未詳。五月四日緬王以龍舟來迎
王。八日到者梗。蓋房十間居王。以竹為城。隨從諸臣
或短衣跣足。與緬婦相貿易。為笑樂。大為緬人嗤。緬
信朝見以跣足為禮。八月十五日各蠻來朝。王欲誇
示諸國。於十三日請沐天波過河。令跣足為諸蠻先
以臣禮見焉。九月緬人進稊穀。給貧乏者。十七年庚

子七月，緬王復請天波過河，以各營逼緬城，乞王救。漢兵無得近關。九月，李定國有疏迎王，內云：「前後共
有三十餘疏，俱不達。」時馬吉翔與李國泰比專事權，
一日翔奏大臣有三日不舉火者，王不應。明日翔奏
合奏，王怒，以御寶擲下，翔即擊而碎之，敬給諸臣。其
凶情如此。十八年辛丑，任國爾回東宮開講，將宋末
聰貝好利言箕書進呈，翔見而切齒。王覽一日，翔即袖
之以出。五月爾復有時事三不可解，疏大既書，今日
勢如累卵，禍急燃眉，猶然泄泄，不思出險。沐勳臣王

皇親亦可主持，豈宜令翔奏獨專大柄。王祖望、鄧居
詔各疏劾翔奏，王固無如翔奏何也。而是時蒲綱大
開賭市，晝夜呼盧不絕，王惟恭與楊大監爭賭，毆拳
喧譁徹內，益為緬人所輕。先是二月二十八日，白文
選密遣緬使賫奏，內云：「不敢速進者，恐有害，必得緬
人送出為上策。」王即回爾書甚切。越五六日，瀾河塔
浮橋為奉迎計，緬人覺之，事不果。三月，錦衣衛趙明
鑑等謀奉世子逸出，出時并殺翔奏。翔奏聞遂以結
盟授緬誣奏，執殺王啓隆家人何慶等。七月二十三

日緬酋殺兄自立隨遣兵士驅王隨從文武諸臣渡
河吃呪水至則盡殺之於是松滋王某沐天波馬吉
翔王惟恭馬雄飛鄧士廉鄧君詔楊在鄔昌琦任國
爾王祖望裴廷謨楊生芳郭璘潘璠齊應翼魏豹王
自京安朝柱王昇陳謙王啓隆龔勛吳承壽張宗伯
任子信張拱極劉相宗寧劉廣銀宋國柱丁調鼎
李國泰太監李茂芳楊宗華李崇貴周公盧公曹公
沈公二楊公皆被其難少頃復以兵三千人圍王所
每三十人擒殺一人八宮搜取財帛於是自縊及被

殺者不可勝數其姓名可紀者吉王其同妃自縊二
貴人楊氏劉氏松滋王妃俱自縊姚文相黃華字能
相馳馬堂二差官趙明鑑王大雄王國相吳承倫朱
文魁吳子戶鄭文遠李旣白凌雲嚴麻子尹襄朱議
漆王國爾等皆死之內官陳德遠等一十八人一行
自縊王與太妃等二十五人聚一小房逾二時通事
引護守緬官至曰不可傷皇上乃移王出居沐國公
房內大小內外共棲一樓三日幾斷伙食兵退姜承
德妻楊氏自縊死馬吉翔第四女哭曰我父在世不

知作何等。人如今已死，人猶罵之。縊數次乃絕。王啓
隆妻吳氏妾周氏既上縊，大監李從龍見而救之。吳
曰：「爾與吾夫厚，應促我死。」反來救耶，卒自縊。吳承爵
妻某氏先縊，子女乃自縊。齊環妻某氏抱子赴水死。
二十一日修葺原所，復請王居之。二十五日進銀米
等物。

檄緬取王

順治十六年己亥春二月，李定國之兵敗於潞江，退
師出騰越。知王已入緬，不敢深入。聞白文選屯兵木
邦，乃就文選謀曰：「王入緬，敕漢兵無入緬關。我兵若
入，恐變生不測。」清兵乃一隨來，無險可恃，莫若就
邊地擇安屯住。招集以圖興復。文選以王既入緬，無
重兵護衛，請身入護。王與定國謀不合，定國遂自引
兵從孟定府過耿馬抵猛緬屯扎。前各營潰兵陸續
來集，^兵勢稍振。越數月，移營孟連，加貝九義及文選部

將張國用趙得勝等皆來歸，乃約元江土司那嵩共
恢復孟良酋長以定國在孟連，恐為所并，糾合夷眾
與定國為梗。定國移兵征孟良，滅之，據其城而大
兵已乘間破元江，那嵩自焚死，事不得集。加貝九義我妻
子在雲南，我卒西王是王，桂令作書以招九義我，九義我
有二心，定國殺之。國用得勝與孔義同來歸者，聞之
心快，總兵唐宗堯者故奸弁，定國令守磨乃，凡兵
將投孟良者，宗堯悉收隸麾下。商客至則盡取其財，
由是商賈不至，以故雲南及阿瓦消息定國絕不聞。

文選自與定國別，即由本邦至錫薄，所至縱兵大掠，
聲達阿瓦，阿瓦有新田二城，新城緬王所居，以田城
居王，文選急攻新城，城中無備，且破矣。緬王給言俟
三日出新城，讓王文選信之，退兵十里，而城中備御未
復固。既三日文選復引兵進攻，反為所敗，遂引兵赴
孟良，會定國，定國遂同文選赴阿瓦，其國用得勝所
部兵仍還文選，時十七年庚子九月也。緬人知文選
敗，定國必復來，乃益修戰守備。十八年辛丑四月，定
國至阿瓦，使人入緬求王，緬人不許，定國見緬人備

禦已固，乃退三十里下營。明日，緬人見定國退，即於城外立木城，日移而前，遂逼定國寨。五月，以象兵與定國戰於木城下，定國則隊稍失利，文選引兵橫衝之，緬人大敗，退保新城。文選定國決計渡江，先遣都督丁仲柳於阿瓦上流造船，緬人知船工將竣，以正兵綴定國，而別遣奇兵搗船廠。仲柳棄船走，船悉被焚。定國與文選議復進洞郎，一面造船，一面攻新城，使兩不相應，乃俱移營。定國在前，文選在後，國用得勝，以九義之死，銜定國，至是遂挾文選北走，將來

奔於我朝。至耿馬，適與吳三省軍相值，三省者定國舊部安隆之敗，三省尋獲大營妻子，來詣定國於孟良，而定國已移營，不相遇。至磨乃，宗堯有叛志，收而殺之，然兵弱不敢入緬地，流連孟定，耿馬間文選退走，遇三省軍，文選見三省，不言而涕出，三省察軍情有變，曰：言雲南降者，皆怨恨不得所，人心思明甚於往日，於是張趙復心動，遂與三省同屯於錫薄。我平西王吳三桂偵知，李自情隙，乃令馬寶率兵追文選，且招之，而自率大兵趨緬，時文選已去錫薄，宗

追及文選於孟養，單騎赴文選營，說之。文選降，封承
恩公。王其妃在文選營，文選降，妃自縊。大軍臨阿瓦，
檄緬取王及妃。十二月三日，緬人令數十夷人連座
擁王去，約二更許至營，則三桂軍矣。九日，大軍回
滇，捷聞我。

皇上思免俘見，康熙元年壬寅四月二十五日，王與
妃及世子俱終於雲南。沅江總兵皮能聞王就執，走
避水西，絕粒七日不死。大兵聞遣騎執能，至，背立
不順命，積十三日不食始瘞。十四日乃斃，仍戮屍。能

婿趙默亦被執，索紙書絕命詞受戮。鄧凱者從王於
緬，王既死，入昆陽普照寺為僧。李定國聞阿瓦消息，
遣人入車里邏羅諸國，乞兵圖興復。會一營人馬盡
歿。六月十一日，定國生辰，病作。二十七日，定國卒。臨
終謂子嗣興及勦統武曰：寧死荒徼，無降也。定國死
未幾，統武亦卒，嗣興來降。

蜀亂

順治元年甲申張獻忠據全蜀惟遵義未下兵部右
侍郎總督川陝軍務樊一蘅及督師王應熊避其地
因檄諸郡舊將會師大舉會巡撫馬乾復重慶松潘
副將朱化龍同知詹天顏復龍安一蘅乃起舊將甘
良臣為總統侯天錫屠龍副之合叅將楊展遊擊馬
應試余朝宗所携潰卒共得三萬人二年乙酉三月
攻叙州應試朝宗先登展繼之偽都督張化龍走遂
復叙州賊將馮雙礼率兵來爭而敗偽安東將軍孫

可望援之相持一月一衛糧盡退屯古蔭州展退屯江津賊乃截化龍於羊子嶺化龍率番兵衝之賊驚潰遁去一衛命展應試取嘉定邛崃故總兵賈聯登及中軍楊維棟取資簡天錫高名佐取瀘州李占春于大海守忠涪初乾既復重慶賊遣劉文秀來攻會副將曾英與參政劉鱗長自尊義至與大海占春張天相等奮力夾擊破賊兵數萬英威名振蜀中亦受一衛節制其他據城奉征調者洪雅則有曹勛及監軍副使范文光松茂則有監軍僉事天顏夔萬則有

譚弘譚誼一衛乃移駐納溪居中調度三年丙戌春展等盡取川南地獻忠大忿恨盡屠境內民沈金銀江中焚宮室急遣可望文秀狄三品王復臣等攻川南州郡連戰不利英祥等乘間趨成都七月賊棄成都之順慶時川中諸郡惟保寧順慶為賊將劉進忠所守而進忠所部多川兵獻忠恨川人之不附已也既屠其民將盡殺川人之為兵者進忠聞之大懼赴王師降且告獻忠所在十二月王師殺獻忠於鹽亭賊兵悉潰而南時英駐重慶稱最強可望猝至

重慶英出不意敗死賊遂陷綦江督師應熊退避畢
節衛未幾死永明王以呂大器代之四年丁亥賊入
遵義而是時大兵入州所至俱下大海退入于涪
袁韜去夔而入於黔之婺川占春避而東下諸擁兵
者率瓦解川地盡入版圖矣已而王師追賊至遵
義糧盡引還於是王祥等復入保順二郡一衛且駐
江上為收蜀計上表永明王以一衛為戶兵兩部
尚書加大子太傅諸將祥等進爵有差於是韜復入
重慶大海占雲陽占春據涪州詣據巫山譚文據萬

縣弘據天字城天錫據永寧應試據蘆衛祥據遵義
展據嘉定化龍勛等各據地自擅而宗室朱容藩及
故偏沅巡撫李乾德以抵制至楊喬然江爾文以巡
撫至各自署置官多於民李自成餘孽李亦心郝搖旗
袁宗弟等復擾夔巫間一衛令不行惟叙州一郡而
已五年戊子容藩自稱楚世子天下兵馬副元帥建
行臺於夔武岡之敗傳永明王已死大器過占春營
具言王無恙容藩乘機僭竊當得罪占春以為然李
乾德亦傳檄聲容藩罪容藩益窘乃北依二譚以兵

攻石碓司占春援之容藩兵敗走死雲陽是時川地
咸附於承明王乾德者少好占駘至蜀諸將中惟許
韜及武大定遂結二人為腹心韜故獻忠別部所稱
姚黃十三家賊大定則小紅狼別部也韜與占春素
不協時駐重慶兵強而饑乾德遣人說展與合兵展
與占春素厚富而弱藉袁武之強以自固納占為
兄弟然展能與袁武合而不欲與占春絕也時通聞
問餽以銀米袁武有所求顧不甚遂曰恨展既韜從
屯犍為展以生辰來為壽乾德曰說韜殺展而分其

貲展死諸將皆解體故乾德卒至於敗可望聞展死
將圖蜀乃為展訟寃使至自奇將兵由川南進而別
遣文秀及白文選渡金沙河出黎州敗王祥於烏江
河取曹勛而襲其後趨嘉定時袁武方拒自奇於川
南撤師還救自奇尾擊之袁武大敗悉就擒乾德投
水死兵復東三譚俱降乃遣別將盧名臣下涪州占
春敗走大海在忠州知不支引兵出夔入楚與占春
來降於王師文秀遂據蜀七年庚寅正月文秀還
雲南令文選守嘉定劉鎮國守雅州三月大兵南

征文選鎮國俱敗 王師入嘉定文光天顏死之初
展之死文光入山不視事至是死焉九月一衛亦死
於山中蜀中將士俱盡九年壬辰文秀文選率兵來
攻保寧 大兵奮擊破其象陣十六年己亥弘詣俱
納款時弘詣已殺文文安之與劉體仁李來亨等欲
討之二人懼來降未幾取馬湖叙州降年勝於武隆
赦而用之於是獻孽之擾蜀者亦盡自成遺孽郝搖
旗袁宗弟劉二虎等尚據巴東十八年辛丑奉 旨
三省會勦 主師駐萬縣賊棄夔州 康熙元年壬

寅正月元旦大軍銜枚進奪羊耳關賊焚六昌縣以
遁二年癸卯復犯巫山 大軍與麇戰而遣兵密斫
其營賊大潰二虎投環死追搖旗宗弟獲之蜀地悉
平

鄭成功之亂

鄭成功南安人。父芝龍娶倭婦生。初名木森。芝龍見森於唐王。王奇之。賜國姓名成功。順治三年丙戌三月。王封成功為忠孝伯。福州破。成功母死於兵。成功號慟不自勝。芝龍約降。成功泣諫不聽。我貝勒挾芝龍北去。成功遂與所善陳輝、張進等乘二艦入海。收兵南澳。得數千人。四年丁亥。聞永明王由榔僭立於肇慶。文移用永曆年號。成功歸自南澳。時廈門、漳州為鄭彩、鄭聯所據。乃泊鼓浪嶼。廈門者中左所也。漳州

者金門也。隸同安為西島。七月入寇海澱，不克而還。八月與鴻逵合攻泉州，敗我提督趙國佐於桃花山。遂圍泉州。五年戊子，我副將王進自漳來援，成功解圍去。三月，攻同安，守將王彪折光秋棄城走，遂入之。復寇泉州。九月，我佟國器、陳錦、李率泰援之，成功乃退。大兵屠同安。六年己丑三月，遣施琅揚才、黃乘、何宸、樞等寇漳浦，守將王起鳳降，授偽鐵騎鎮。尋改偽正兵鎮，遂下雲霄，抵詔安，屯水關，令黃廷、何宸、樞守盤陀嶺。官軍攻盤陀，宸、樞歿焉。七月，永明王遣

使至島，封成功為廣平公。七年庚寅，潮人止曹海周全斌道，成功入潮州，敗我師於潮陽，師還，遂入西島。西島為鄭彩、鄭聯所據，成功師抵廈門，聯方醉臥萬石崗，報至，不得通詰。朝酒醒，出見成功，嘆曰：「兄能以一軍見假乎？」聯未及對，諸執銳者前矣。遂上麾軍過聯船，兵士皆齧舌服，莫敢動。遂并聯軍，彩率所部遁於南中，已殺聯而復彩。成功將至，彩議全軍出遊，聯不從。又不設備，故及。成功既入西島，軍勢益強，海寇皆屬焉。十二月，王師下廣州，守將杜永和、大尹瓊州成功。

謀往接之。八年辛卯，率衆而南。二月，次平海衛。我閩撫張學聖聞成功南發，急調馬得功取廈門，偽守將鄭芝莞遁。四月，成功還自平海，誅芝莞，遂趨廈門。而得功已為鄭鴻達所攻，逸去兩日矣。是月，施琅來降。世祖以琅為福建水師提督，駐海澱。琅有軍校犯令，將殺之，成功急止之，不從。故成功遂欲殺琅，蘇茂縱琅遂來歸。於是成功并憾茂。五月，成功寇南溪。十一月，敗我提督楊名高於小營鎮。十二月，寇漳浦。九年壬辰正月，寇海澱。二月，寇長泰。我副將王進勇無敵，蹶

老虎，成功偽中提督甘輝與戰於北嶺，兩馬相搏，不相下。己而兩家兵至，乃解。進入長泰，輝攻被之，進走郡城。漳州屬邑皆下。五月，成功圍漳州。凡七閱月，城中食盡，人相食，枕藉死者七十餘萬人，間存者氣息僅屬。雖悲泣不能下一淚。有士人饑死，鄰舍見其食之，腸中歷歷皆故紙，字畫隱隱可辨。鄰舍見見之一，慟亦絕。十月，金固山援至，成功令偽右衛鋒鎮柯朋接戰而敗。偽禮武鎮陳鳳援之亦敗。偽右武衛周全斌援之亦敗。成功大崩潰，退保海澱。十年癸巳五月，

金固山攻海澱城壞百餘丈成功親立雉堞堵禦不能破一日空炮遙發成功曰是將臨城矣勒兵持斧以待令曰敵在方斫官軍渡澱呼登城衆執巨斧以斫隨斫隨落澱濠為之平固山始解圍去十一年甲午世祖遣人入海招撫遼豹就撫文京成功不順命時方議撫局成功乘機登岸措餉大擾福州興化等郡十月復遣滿員入海議撫無順意歸報乃置芝龍於高祖芝豹於寧固塔十二月寇漳州我漳州守將劉國軒降於成功十邑皆下遂畧泉州不能破而還十一

年乙未正月寇仙遊五月遣偽忠振伯洪旭偽北鎮陳六御寇舟山破之以六御守備日招降我台州鎮馬信寧波鎮張宏德六月破安平鎮及惠安同安南安三邑十一月我定遠大將軍庶子王至閩成功遁回島中十三年丙申正月庶子王自泉州出攻西島風不利引還五月殺蘇茂、縱施琅成功恨之至是敗於揭陽遂令殺茂六月董梧及茂部將蘇明來降世祖以梧為海澱公駐漳州明為尋李幾昂邦內大臣梧從蘓茂敗於揭陽故來降十月庶子王班師成功

進畧温台等郡十四年丁酉三月成功回島遣甘輝
周全斌攻寧德殺我滿帥阿克襄、既墜馬猶手刃
數人而死十五年戊戌永明王遣周全湯航海進成
功為延平郡王成功遂議大舉入寇金陵七月以黃
廷為偽大提督留守餘俱從行甲士十七萬習流五
萬習馬五千戈船八千鐵人八千鐵人者周身披鐵
畫以朱碧彪文陳於行首聳立視馬足而斫之至浙
江攻臨樂清等縣攻陽山暴風漂沒八千餘人成功
幼子溺焉十六年己亥五月至寧明諸將請先取寧

明為老營不聽七月抵焦山成功集諸將議曰瓜鎮
為金陵門戶宜先破之乃令偽右提督馬信前鋒鎮
統領余新進奪譚家洲偽材官張亮督善泅水者盪
舟斬斷滾江龍偽兵侍張煌言會偽水師提督田雄
^章章候滾江龍既斷即進據瓜州上流焚奪滿洲木城
成功與甘輝前鋒天祐等直搗瓜州我操江朱衣祐城
守右雲龍率兵一萬會戰背港而軍戰未合張亮已
斷滾江龍對岸夾擊偽右武衛統領周全斌率兵帶
甲浮渡直抵城下偽正兵鎮韓英奪門入城遂破雲

龍陣歿衣袂逸去其譚家洲及滿洲木城俱潰成功
令偽援勅左鎮劉猷守瓜州餘皆渡江趨鎮江我提
督管效忠以步兵駐守銀山騎兵移當大路成功以
銀山迤府治為天爭地夜引兵奪之遲明大軍分
五路三疊壓壘而軍成功令設火炮多鼓鈞聲江水
震沸兵士皆下馬殊死戰效忠北鎮江守將高謙岸
成功以周全斌黃昭守之層邑皆下甘輝進曰斷瓜
州則山東之師不下據北固則兩浙之路不通但坐
鎮此南都可不勞定也不聽率師薄金陵八月至觀

音門以黃安總督水師守三汊河口成功率諸將由
儀鳳門登陸屯岳廟山甘輝以守禦既固恐難猝授
為諫不聽大軍以千騎來薄偽前鋒鎮余新較手敗
之遂輕敵不設備軍士捕魚飲博為樂我副將梁化
鳳偵知之由儀鳳門穴城出軍皆銜枚疾走薄新營
新不及甲遂就擒成功急令翁天祐馳援已無及
大軍既敗余新遂以步兵數千直搗中堅而以騎兵
數萬遠山後出其背前後夾擊成功大敗諸偽將各
潰走不相顧成功麾軍急追甘輝且戰且走至江騎

能屬者三十人被執殺九月成功還師攻崇明不下
偽正兵鎮王起鳳傷炮灰十月還島哭甘輝而後入
曰我從甘輝言不及此立廟祠之十七年庚子五月
世祖命將軍達壽總督李奉春率兵大搜兩島令大船
出漳州小船出同安檄廣東投誠將士許隆蘇相等
會海上成功令陳鵬守高崎遏同安之師鄭泰出浯
州遏廣東之師自勒諸部扼海門以禦漳州之來討
者成功既至海門令偽五府陳堯英傳令諸將碇海
中流按軍不動令未畢漳船風利遂迫海門諸將倉

卒受命未敢先發大兵乘之偽閩安侯周瑞與陳
堯英俱死焉日向午東風轉盛成功自手旗起師風
吼濤立北人不諳海性眩暈不能軍而退是日同安
軍出高崎陳鵬約降偽副將陳蟠覺之曰事急矣當
決一戰麾其屬與偽殿兵鎮陳璋合擊之我兵
退陷於淖而潰成功殺鵬以蟠代之許隆蘇利後二
日始至知兩路功不成遂還達壽回福州自殺十八
年辛丑成功議取臺灣、東倚山西薄海北界雞
籠城與福州對峙南則河沙磯七琉球近焉周襄三

千里水陸之產咸備。初芝龍與群盜出沒其地。後為紅夷所據。成功自江南敗還。地蹙兵弱。適紅夷甲螺何斌逃至廈門。見成功。成益言臺灣富彊。為四省要害。且言可取。成功大喜。東甲遂行。三月泊澎湖。次鹿耳門。虎自門者。水淺沙膠。海道紆折。僅容數武。成功至適水驟漲丈餘。大十戰艦銜尾而進。紅夷大驚。成功引兵登陸。克赤嵌城。遂攻王城。堅守不下。乃環七崑身以逼之。十月。命李榮芝龍於此市。鄭氏子孫在臺者。無少長皆伏誅。十二月。成功圍王城不下。乃縱火

燒其灰板。船敗者一。大終無降意。成功乃使人告之曰。此地乃先人故物。今我所欲得者地耳。餘悉以歸爾。荷蘭乃降。成功既得臺灣。制律法。興學校。改臺灣為偽安平鎮。赤嵌城為偽承天府。府一曰承天。縣二曰天興萬年。康熙元年壬寅五月。成功卒。成功自僭亂至今。凡十七年。卒年三十九。時成功長子經在廈門。臺人以成功弟龍襲理臺事。六月。計至島。經自稱招前大將軍嗣立。我靖南王耿繼茂總督李率奏遣人持書招經。經請如朝鮮事例。不報。經於是。以周全

斌為偽五軍都督，與陳永華、馮錫範等帥兵還臺。黃昭蕭拱宸謀奉龍拒經，十一月昭攻經，潰。全斌率兵力戰，經還射昭，昭殪。衆皆遠巡稅甲，經遂入臺。二年癸卯，永明王訃至，經猶稱永曆年號，殺鄭泰，以其貳於襲也。秦子繯緒弟鳴駿偽忠靖伯陳輝偽武衛揚富偽虎衛何義等俱來降。於是天子銳意南征，遣人約紅夷，合兵攻島。十月，耿繼茂、李率泰滿帥軍會紅夷出泉州，提督馬得功出同安，黃梧、施琅出漳州，經令全斌御之，得功先至，戰於烏^口於陣已

而王師大集，全斌潰，退守銅山。大兵入西島，之民爛焉。三年甲辰，黃廷、周全斌、林順俱來降。四年乙巳，水師提督施琅疏請攻臺，不克而還。上命琅及全斌俱還京。七年戊申，上命明珠、蔡毓榮至漳州，遣興化知府慕天顏持書招諭，經遣柯平、葉亨入奏，請如朝鮮事例，不報。十一年壬子，吳三桂據雲南、四川、貴州以叛。十三年癸丑，耿精忠據福建，執總督范承謨以叛。八閩鎮將皆附於精忠。五月，精忠調海澄總兵趙得勝，兵得勝不從，來奉經，以得勝為偽

興明伯左都督時經倫安日久兵甲鈍敝精忠易之
經遣人於精忠借漳泉二府精忠不許耿鄭交惡經
遣馮錫範取同安精忠偽守將張學堯降精忠懼使
王進守泉州王進者老虎也時降於耿至泉未幾為
王錫範所逐先是經偽平北將軍王進功入奏精忠
羈之福州至是進功子錫範誘殺泉州守將賴玉遂
逐進而附經以錫範為偽指揮使七月王師圍
潮州精忠不能救偽總兵劉進忠納款於經遣偽
援勦左鎮金漢臣率舟師援之全軍俱沒九月精忠
命漳浦降總兵劉炎與王進為犄角取泉州十月劉
國軒敗進於塗嶺十一月趙得勝王錫範攻漳浦劉
炎降於經遂援潮州興王師戰於北岡潮州圍解
十三年甲寅正月精忠使張文翰往經議和以楓亭
為界始通好也五月國軒入潮州興何佑進忠狗屬
邑之未下者我平南王尚可喜帥兵十萬來攻晨掩
佑軍佑死戰國軒繼之可喜北去月經帥諸將圍漳
州先是癸丑我海澄公曹梧卒於漳州子芳度權知
軍事經一再入島以芳度為偽德化公芳度陽受命陰

通 本朝事泄，經率兵攻之。芳度使兄芳泰突圍入
粵乞救，自與諸將分守四門。攻圍六月，十月部將
吳淑開門出降。芳度投開元寺東井以死，不及援師。
間三日，自事間。上震悼，贈王爵，諡忠勇，世襲十二
代。經入漳州十四年乙卯二月，吳三桂兵至肇慶，碣
石總兵苗之秀、東莞守將張國勳降於經。有韶州
平南王尚之信，降於三桂。三桂檄讓惠州於經，國軒
入據之。五月，精忠汀州偽守將劉應麟以州款於經。
以應麟偽偽奉明伯使吳淑入據之，始叛盟也。九

月 王師入閩，精忠降。其興化偽守將馬成龍以州
降於經，以成龍為偽珍鹵伯使許耀入據之。耀沈
酒酒色，不在軍事，乃以趙得勝何佑代焉。十一月，精
忠邵武偽守將楊德以州款於經，以德為偽後勁
鎮。吳淑入據之。當是時，經悉有泉潮漳韶惠汀興邵
八郡之地。十二月，王師敗吳淑於邵武城下，淑奔
還島中。十五年丙辰正月，王師圍興化，何佑疑趙
得勝貳於我，戰敗不救，得勝死之。佑奔泉州，興化陷。
二月，漳泉潰，經遁入島。三月，我和碩康親王遣知府

張仲舉復申前議，經勿從。四月，移諸將入吉寧，劉炎奔歸。王朝劉進忠降於吳三桂，尋歸。王朝俱磔燕市。國軒棄惠州回島，八郡盡失。十六年丁巳二月，國軒入寇，玉洲、三汊、河、福、河、下、游等堡俱下，擊敗援兵於江東橋，取石馬，遂入鎮，取灣腰樹、馬洲、丹洲諸堡。是時，總督即廷相援兵漳上，嗣公黃芳世都統胡克寧海將軍喇哈達都統穆里林平南將軍賴塔副將朱志麟姚公子李阿哥等先後來援，俱敗。國軒遂取平和漳平圍海澄。六月，逮即廷相，以吳興祚為閩撫。姚啟聖為總督，趨諸軍，援澄諸將高壘自完，願視不救。城破，提督段應舉、提兵黃藍死之。國軒進陷長泰、同安、乘勝圍泉州、梅勒雅、大里城，守不下，乃徇南安、永春、安溪、德化等縣。八月，官軍復漳平、長泰、平和等縣。我學士李光地道喇寧海，賴平南由安溪出，同安、巡撫朱興祚由仙遊出，永春提督楊捷由興化下，惠安提兵林賢、黃鎬、林子威帥舟師，由閩安出，定海、尅期援泉。八月，林賢等敗偽樓船中鎮，蕭琛於定海。國軒退還漳州，以二十一鎮兵與王師戰於龍虎。

山都統胡克先合不利啓聖援之亦潰精忠故仇鄭
親督戰立斬退縮者三人大呼而入馬卒南繼之陣
斬偽海鎮鄭英吳正璽等破營十六座斬首四千級
捕虜一千二百人亡溺以萬數國軒泗河遁十八年
己未十月官軍攻蕭^并寨吳淑被壓死啓聖聞第
於漳州曰條^修束館以官爵銀幣餌未歸者漳泉間人
率稱啓聖能懷遠也十九年庚申春正月提督方正
色及統兵林賢陳賢黃鎬楊嘉瑞以舟師伐島逼海
擅興社提兵與之沿海上下經命偽左武衛林陞率

陳諒江勝朱天還禦之既望我軍畏其衆也不戰而
潰天貴來降二月國軒入島啓聖乘間復十九寨遂
覆兩島徑及諸將遁入臺二十年辛酉正月徑卒於
臺灣嗣立凡十九年徑長子克塽向監國實非鄭氏
出徑死徑母董即收克塽殺之以克塽嗣十月啓聖
疏薦萬正色為陸路提督施琅為水路提督圖大舉
琅治兵平海二十二年癸亥六月官軍發銅山窺
澎湖國軒帥兵屯風櫃嶼牛心灣以待琅令監理曾
誠吳啟爵張勝許英阮欽為趙邦試等以七船突入

縱火焚舟國軒分兩翼合擊琅自將突圍赴援互有
殺傷明日大兵取虎嶼并彭水故賊及王師雲
集泉水忽甘衆志益奮琅乃分兵為八隊每隊七船
各三其疊琅居中餘以屬諸將國軒發火矢噴筒煙
焰蔽天我軍畏創力戰無生志陣斬偽將林陞丘
輝江勝陳啓明吳潛王隆等國軒兵士死者萬餘人
焚大小戰艦二百餘艘國軒大潰從吼門佚出彭湖
破國軒入臺与馮錫範何佑丘磊等奉克塽決計來
降七月遣劉國昌馮錫珪等齎延平王金印一招討

大將軍金印一公侯伯將軍銀印凡五籍土地府庫
軍實詣軍門降八月琅至鹿耳門國軒使人除道迎
入克塽嗣立凡二年時年十五自成功迄塽凡三世
三十八年僭偽悉平克塽至京師授漢軍公錫範漢
軍伯國軒天津提兵何佑梧州副將設府一日臺灣
縣三曰臺灣曰鳳山曰新羅二十九年庚辰上特
命成功及子徑之喪歸葬南安寧靜王術桂者遼王
後渡海依成功澎湖既破術桂以王印授克塽遂投
環死妾袁氏王氏秀姑梅姐荷姐從益于臺越十月

墓葬於鳳山縣長治里。

襍亂

順治二年乙酉金声桓入南昌南九款附德化李舍
初傾家起兵眼山連破德安瑞昌時民情初附惶惑
驚恐無敢言計舍初者未幾舍初所部王拐子私款
於我守澤將余世忠因襲眼山舍初死之同死者生
員李映陽武生唐扉鄧士鳳熊九鼎宗麻子

順治二年乙酉七月德安郭賢操起兵克德安遂破
建昌所部高長子私款於我執賢操以獻時方議撫
局釋勿殺三年丙戌四月賢操集眾圖再舉我師

偵得環其廬焚之獨賢擇跳逸去五年戊子金王叛
賢操復投袂起為我澤帥所執殺之子七次良錫與
從子良銓攻建昌中流矢死三良鐸從烏兵營戰死
同起兵死者德安諸生桂登魁胡戒登魁妾胡氏從
死

順治二年乙酉右副都御史新昌陳泰來捐貲募眾
遣所部李凌虹提兵復萬載殺我所置令杜章卿連
破新昌十二月令子正儀正儼往他省而自帥師東
下金聲桓使署驛傳道戴國士招泰來而以大軍

隨其後國士入見泰來甫出大兵已壓壘陣矣泰
來不及脩兵遂敗泰來死黃氏祠中國士與泰來姪
也故聲桓使之給泰來而使之不疑同起兵死者瑞
州劉詒新謀廷椿胡親民

順治二年乙酉我兵下瀘溪以李光署縣事邑貢
生魏一柱縛光送鄭彩所劓之與張載述畫秉守瀘
敗我師於密潭四年丁亥王得仁下令族瀘之丁
傳魏三族一柱遂棄妻子走閩襲破將樂聯結永西
德化興安諸藩攻克建寧王師至圍而攻之五閱

月始破一柱與諸藩俱死之惟興安先事出不與
順治二年乙酉南昌舉人汜水知縣胡海定與海川
董德興起兵金州十月王師取婺源金川兵絕我
糧道王師退復攻婺源入之殺我所置官吏王
師襲海川諸營定被執論殺首既殊而不仆同死者
為揭新

順治二年乙酉起兵龍泉者為天啓進士劉士禎入
泰和廬陵三年丙戌吉安復陷士禎遣四子肇復入
閩求援而令季子禕升從李陳玉起兵信豐為贛聲

援贛破避於黃田五年戊子金王叛士禎復令肇復
募兵從劉一鵬圍贛州而令禕升趨南雄金王敗歸
匿龍泉郡守索之急乃絕粒死禕升後戰死長橋鋪
順治三年乙酉南都陷江北總兵黃斌卿遁歸唐王
僭立斌卿上恢勸事宜力陳舟山為海外巨鎮北可
窺長江南可取吳越唐王善之封斌卿肅鹵伯令屯
兵舟山斌卿於是立制度籍民田皆入官民十五
以上者藉為兵聚糧造船為竊據計三年丙戌六月
魯王敗失浙東平夷將軍定西侯張名振護王出海

投斌卿斌卿不納請夷侯王之仁走舟山斌卿擊殺
之盡并其衆之仁部將張國柱來爭復為斌卿所敗
又劫義師將軍胡來貢船襲殺監軍御史荆本徹四
年丁亥有兩王子浮海來至斌卿沈之外洋而奪其
費六月忠威伯賀名堯來歸殺其全家奪其船五十
號是時斌卿勢張甚有標將王大振者斌卿取索無
厭足乃逃去與鄭彩張名振阮進等共訐斌卿逆跡
於魯王三命諸鎮會計斌卿將佐皆逃阮進手斫斌
卿破其腦而沈之海

吳江進士吳易初為吏可法監軍揚州蘇州相繼失
易聚衆走太湖與同邑舉人孫兆奎諸生沈自烜自
炳武進吳福之手結營長白蕩朱涇四保滙則有諸
生周毓祥周謙等出沒旁近州縣以助餉為名富家
大室率遭搶劫黠者或預賄以免禍我兵搜勦則
彼出北入北出彼入間或相遇互有殺傷四五年間
湖路梗塞是亦江南一大劫也順治二年乙酉十
二月八日諜報賊在泖西地方發兵出勦賊遁去
官兵至上澤鎮從肆淫掠總鎮聞梟示十數人令搜

各船所掠婦給還本夫兵士畏法遂以所掠之婦沈
之江中三年丙戌正月忽傳白黨破城城中男婦悉
走避明日搜捉逃民駕船以緝賊五月五日賊聚四
保滙泛蒲耐飲大兵擁至殺數百人獲其魁羅騰
蛟五月六日白黨張飛遠襲破金山衛張故諸生兄
弟俱負膂力與吳易合營襲衛城協鎮出戰飛遠遂
遁去先是飛遠釣城中助已者悉墨其鼻飛遠既遁
城中之通張者鼻尚墨也協鎮悉殺之七月獲周毓
祥送南京殺之周謙來降未幾獲吳易殺之杭州八
月白黨悉來降提督吳兆勝人給一免死牌其頭自
悉於原官加銜一級於是乞兒賤隸曾入白黨者悉
有參游之號

順治二年乙酉六月三日吳淞副總兵吳志葵帥舟
師入申浦直抵米市塘駐泊旗號四會松人望之以
為義旅也及至惟以令箭提某富室索銀若干某富
室索米若干縱兵大掠所至一空遂逐我朝所置
守令公署獄舖盡毀於是松城有民而無官既移泊
黃天蕩窺蘇之閘門令參將魯之璵以五百人攻之

魯歿於陣，全軍殲焉。志葵氣沮，退師泖中。已而廣撫督沈猶龍據松江，而陳子龍、徐子遠等亦起兵太湖。中軍號振武，然與志葵俱泊城外，不與城守。城破，亦不能救也。王師取松江，志葵將航海以遁，移師申浦，抵得勝港。我師以小舟薄之，掩其不意，須臾火器齊發，烟焰蔽天。軍遂大潰，志葵被執，乞降不許，殺之。浦中積尸如丘焉。子龍後死，吳兆勝之亂。廬陵王謁妻劉淑英，父鐸揚州太守，死瑞難。淑英年十八而寡，常割股以療姑疾。甲申國變，自矢報國。

集家僮百人，捐貲召募成一旅。順治三年丙戌，楚將張先壁駐永新，淑英領所部赴焉。張奇其才，欲娶之。淑英不可，張因分遣其部眾。淑英忿恨卒。

順治三年丙戌，大兵取廣州。四年丁亥三月，兵科給事中陳邦彥及新會王興、潮陽賴其肖先後舉兵。說甘竹灘積盜余龍圍廣州，而已發高明兵從海道入珠江，與龍會時。大兵在桂林，聞亂還救，聲言取甘竹灘。龍軍素無紀律，遂退。邦彥亦却歸。四月，遣門人馬應芳會龍軍取順德。應芳敗，赴水死。龍再戰於

黃連江敗歿。初廣州之圍，我巡撫佟養甲獲降者，知謀出邦彥，襲其家，執妾何氏及子和尹虞尹，以招邦彥。邦彥不從。養甲壯之，仍善待其妾及子。後郡紳李皇一舉人杜璜起兵攻肇慶，乃殺之。璜等亦敗死。八月，東閣大學士陳子壯亦起兵九江，邇兵多登戶番鬼善戰。九月，邦彥密約子壯復攻廣州，水陸並進。旦約原廣州衛指揮楊可觀為內應。子壯先二日至城中，不敢應。又張檄者為我所獲，事以不果，可觀被殺。時成棟攻張家玉於新安，邦彥因與子壯謀曰：成棟

聞警必急還，我伏兵禺珠洲側，而公以大艦逼其西，可以得志。望青旂而朱旂者，我軍也。成棟還至禺珠洲側，邦彥以火舟衝之，焚其數舟。成棟引而西，會日暮，子壯不能辨旗幟，疑皆敵舟也。陣遂動。大兵擊之，遂潰。子壯長子中庸戰歿，會故御史麥而炫破高明，迎子壯。子壯奔高明，邦彥奔三水。未幾，清遠指揮以城迎邦彥，邦彥人清遠與諸生朱學熙同城守。數日，城破，邦彥率兵巷戰，肩受三刃，遂被執，繫獄。五月，殺之。學熙自縊於朱氏園。未幾，破高明。子壯所署知

縣朱實蓮戰死子壯而炫執至廣州論殺子壯母自
縊。

順治四年丁亥故廣信巡撫張家玉與舉人韓如璜
結鄉兵攻東莞入之藉前尚書李覺斯家以擣士甫
二日大兵至家玉敗走西鄉如璜戰歿家玉祖母
陳母黎妹石寶俱赴井死妻彭被執不辱死西鄉大
豪陳文豹奉家玉取新安復入東莞未數日大兵
復來攻家玉敗走鐵岡沿途集眾復得數千人遂入
龍門博羅連平長亨攻惠州克歸善還屯博羅大

兵至走龍門募兵復得萬人分龍虎犀象四營拔增
城而據之大兵來攻分其軍為三倚谿崖以自固
大戰十日乃敗諸將請潰圍出家玉歎曰矢盡炮裂
欲戰無具將傷卒斃欲戰無人因徧拜諸將赴野塘
以死初家玉之走鐵岡也覺斯盡發其先壘毀其家
廟成其鄉以復焉。

樂平倪大顯與兄大恢大登俱以勇力聞乙酉饒州
司理周損幣致之周敗歸黃道周黃敗從曹大鎬
順治五年戊子王得仁大發兵屠樂平軍中聞顯勇

爭取之，以為奇功。有僧長八尺餘，下馬搏頭，斫僧
應手落已。大兵悉集，顯知不支，遂自刎。大板大登
被執論死。

吉水王寵者，初從劉同，升起兵，以所部不戢，去已往
來，臨吉撫贛間，一日為我兵所獲，寵即說降。夜半
起，盡殺同伴，即載其旗幟以下，過新淦、峽江，令見旗
幟以為本兵也。出迎江潯，寵遽起，擒殺連破二縣，遂
遁。已吉水鄒文鼎與從姪敬起兵，寵與合營。大兵
至，鼎敬俱敗，獲鼎赴水死。敬解省論殺，寵急書追勅

王寵四字於旗，大呼殺賊，遂遁去。既逸，我兵始知

其即寵也。明年金王叛，遍招王寵，不得。蓋寵入山死

矣。同時有安仁僧丹竹者，益藩起兵，所招三十六營

之一也。益藩敗，從揭重熙襲撫州，猝遇我將王得仁，

丹竹以步逐馬，戟及得仁面，幾獲之。聲桓兵過安仁，

聞丹竹病，遣九騎縛之。丹竹聞力疾起，呼所部十餘

人先伏於隘，偵知金騎在酒肆中，丹竹單身入肆，金

騎見其為僧，而不知其即丹竹也。回問識丹竹乎，竹

應聲曰：我即是。遽拔刀殺二人，七騎者上馬馳，遇伏

獲其二、前再遇、伏獲其三、惟二騎得歸、自聲桓被廣
信多、鹵獲丹、竹、邀之、先以木、擣置水中、日持長槍、火
箭、逐之、聲桓、棄舟走、盡得其、所獲、後率壯士、邀見
勒、奪騎之入、閩者、大兵忽至、馬蹶、見殺、

順治四年丁亥四月、松江提督吳兆勝據城以叛、先
是三年丙戌六月、李成棟調往福建、兆勝移鎮松江、
有周謙者、故從白黨、來降者也、稍知文墨、兆勝、驢焉、
因通海寇黃斌、御、令舉兵內向、給事中陳子龍、舉人
殷之輅、生員張寬、等皆與其謀、斌、約於四月十六

日兵至、而海舟非風不行、連日北風大作、舟不時至、
海防同知楊之易、推官方重、謂知其謀、潛移書洪承
疇、言兆勝反狀、承疇未之信、即以其揭下兆勝、
大懼、十五日夜將半、以令、笮、促之、易重、謂至殺之、立息、
剛日、黃兵、必至也、天既曙、城外寂然、副將詹天祥、知
事不濟、即同都司高永義、率兵入、執兆勝、按誅、將校
十七人、二十四日、大兵至松江、執子龍於廣富林、
子龍乘間赴水死、出其屍、戮之、子時、陳方五歲、亦論
殺、殷之輅、張寬、遂至南京、斬於市、

孔徹元徹哲建昌人。家奉封有萃觀光者。其客也。

順治五年戊子。金王叛。王師圍之。哲往援。潰。殺元

心。勿能忘也。六年己丑。七月。訛傳瑞德七邑奉靖武

遺。帝元聞大喜。遂入城。遂逐我所置令。到時後。已而各

邑寂然。同黨執元以獻。兵卒皆散。而觀光心勿善也。

七年庚寅。將揭竿起南昌。跡匿。走鄱陽。為巡卒所獲。

論死

順治五年戊子。金吉桓據南昌以叛。星子諸生吳江

起兵應之。王師再平江州。江返南康。為拒湖計。結

壘開先寺。已敗走都昌。得舊鎮張士彥。標將黃才。潰

兵二百人。部勒之。北異復舉。已而黃才歿於我。執江來

獻。論死。

順治二年乙酉。吏部尚書郭維經之子。應銓。應銓

煜。舉兵臨川。與我兵大十十餘戰。頻有斬獲。唐王

授應銓。應銓。銜兵部郎中。應煜。戶部主事。維經視師。贛

州。應銓駐兵龍泉。為贛特自。而聲勢不相。應四年丁

亥。我兵攻龍泉。應銓設伏。敗之。部將劉文煌引

我兵入城。銓銜兄弟皆被執。應銓投崖。殿下不死。劉一

鵬欲降之，不順命，扼吭以死。應衡至吉安，一鵬飲以酒，應衡碎飲，具大罵，齧齒斷臂以死。應煜見我按董學成唾而罵之，袖腸死。尤酷。

